

Nacionalistička retorika onemogućava zdravu političku atmosferu



Visoki predstavnik i specijalni predstavnik EU u BiH Miroslav Lajčák ponovo skreće pažnju na bespredmetnost i štetnost nacionalističke i antidržavne retorike te samim time zanemarivanja evropskog puta BiH. Evropske integracije moraju biti iznad dnevne politike. Posljednji nastupi premijera RS Milorada Dodika u Zagrebu predstavljaju direktnu potvrdu njegovog suštinskog nerazumijevanja evropskih vrijednosti, kao što su dobrosusjedski odnosi i međunacionalna tolerancija. Nije slučajno da su njegove izjave naišle na vrlo negativnu reakciju druga dva konstitutivna naroda u BiH i stvaraju atmosferu nepovjerenja u regionu.

To je destruktivan, a ne konstruktivan način vođenja predizborne kampanje. Iskorištavanje nacionalističke platforme za svoju promociju je kontraproduktivno stvaranju zdrave političke atmosfere. Stabilnost i prosperitet čitave zemlje, što uključuje i oba entiteta, ovisi o pozitivnoj političkoj atmosferi. Napeta situacija odgovara samo onima koji su zainteresirani za nered.

Izjave koje dižu tenzije često čujemo od visokih dužnosnika političkih stranaka, među kojima prednjači Rajko Vasić iz Saveza nezavisnih socijaldemokrata. Kao čovjek koji obavlja javnu dužnost mora biti svjestan svoje odgovornosti i mogućih posljedica njegovih javnih stavova. Također, mora biti

svjestan da je BiH multinacionalna zemlja i da nikom neće biti tolerisano korištenje rječnika međunacionalne mržnje.

Jedna od posljedica zatrovane atmosfere je to da neki političari u ovoj zemlji nisu spremni da surađuju sa svojim sugrađanima, odnosno da sugrađane druge nacionalnosti ne smatraju svojim te nisu spremni da preuzmu punu odgovornost za upravljanje ovom zemljom. Visoki predstavnik i specijalni predstavnik EU želi posebno istaći da je huškačka retorika, čak i uz jasan izostanak potencijala sprovođenja iste u djelo, najveća prepreka ostvarivanju jednog od dva politička uslova za zatvaranje OHR-a i prelazak u Ured specijalnog predstavnika EU, tj. davanje pozitivnog mišljenja o situaciji u BiH od strane PIK-a, što ljudi koji vode ovu zemlju ne bi smjeli smatrati kao tek neko formalno pitanje.

Visoki predstavnik i specijalni predstavnik EU stalno ponavlja da je Bosna i Hercegovina međunarodno priznata i neupitna i da je to pitanje uzalud potezati. On očekuje da građani Bosne i Hercegovine neće dozvoliti da budu uvučeni u ovu manipulaciju, čiji je jedini cilj skrenuti pažnju sa pitanja koja su od vitalnog značaja za njih i ovu zemlju, kao što su evropska budućnost, otvaranje novih radnih mjesta, borba protiv korupcije i siromaštva te povećanje odgovornosti izabranih političara. OHR ne želi vidjeti predizbornu kampanju punu neprimjerenih izjava neodgovornih političara i stalnih reakcija na njih, ali se neće ustručavati da reaguje u pojedinim situacijama, ukoliko smatra da je granica podnošljivosti pređena.